

INUIT ATAQATIGIIT

INATSISARTUNI



Nuuk, 30. november 2012

Inatsisartut Suleriaasianni § 37 naapertorlugu matumuuna imaattunik Naalakkersuisunut apeqquteqarpunga:
(Inatsisartuni ilaasortaq Debora Kleist, Inuit Ataqatigiit)

Apeqqutit:

1. Nunaqqativut innarluutillit Danmark-imiittut angerlartinniarnissaannut pilersaarutit naalakkersuinikkullu takorluukkat suuppat?
2. Nunaqqativut innarluutillit Danmark-imiittut Nunatsinni paaqqutarineqarlutik najugaqalersinneqarsinnaanerata eqqarsaatigalugu takorluukkat qanoq piviusunngortinniarneqarpat aammalu tamanna anguniarumallugu ulloq unnuarlu angerlarsimaffinnik nutaanik sanaartortoqalersaartoqarpa imaluunniit annertuumik innarluutilinnut inisat pioreersut ilaniarneqarpat?
3. Nunaqqativut innarluutillit Danmark-imiittut angerlartinniarnissaannut periusissaq qanoq iluseqarpa?
4. Nunaqqativut innarluutillit angerlartinniarneqarnissaannut atatillugu kommuunit piareersaatit iliuusissallu suut pilersaarusiulereertariaqarpat?
5. Innarluutilinnik sullissisussat soorliit aammalu ilinniakkatigut piginnaasatigullu piumasaaqatissat suut Kommuunit angerlarartitsisoqalertinnagu eqqumaffigisariaqarpat, aammalu pisariaqartitsineq malillugu piginnaanngorsaaqqiinissaq, ilinniartitsinissaq aammalu piginnaasaqalernissaq Naalakkersuisut qanoq qulakkeerniarpat?
6. Innarluutillit angerlarartinneqarnissaannik Kommunit qassit kissaateqarnikuuppat?
7. Nunaqqativut innarluutillit Danmark-imiittut qassit Nunatsinnut angerlarumallutik kissaateqarnikuuppat, kissaatillu piviusunngortinneqarsinnaaqqullugit Naalakkersuisut qanoq iliuuseqarpat aammalu qanoq ilungersuuteqarpat?
8. Nunaqqaterput innarluutilik Danmark-imiittoq Nunatsinnut uterusussanngippat inatsisitigut qanoq pisinnaatitaaffeqarpa?
9. Nunaqqaterput innarluutilik Danmark-imut inissinneqartussanngortitaasimasoq Danmark-imi najugaqaannarusulluni kissaateqarpat, taava danskit oqartussaasuinut akiliisussaataaneq nuunneqassava?
10. Nunaqqativut innarluutillit Danmark-imiittut tamarmik danskit inatsisaat imaluunniit kalaallit inatsisaat malillugit isumagineqartussaappat?
11. Innarluutilittavut sullinneqarnerat pillugu Naalakkersuisut Danmark-imi kommuunenut nutaamik sinaakkutissamik isumaqatigiissusiorsimappat, taamaappallu tamanna qanoq iluseqarpa?
12. Nunaqqativut innarluutillit Danmark-imi isumagineqarnerinut atatillugu akigitinneqartut qaffariaataat Nunatsinni kommuunit nammassinnaasaasa iluannissasut Naalakkersuisut qulakkeersinnaavaat?

Tunngavilsersuut:

Nunatsinni aammalu Danmark-imi innarluutillit atugaat pitsanngorsartuarlugit suliniartoqassasoq Inuit Ataqtigii pingaartitaraat.

2011-imi innarluutillit isumagineqarnerat kommunenit akisussaaffigineqalerpoq. Suliasaqarfik annertoreeqisoq taamaalilluni kommunenit ataasiakkaanit annerusumik kivinneqartussanngorluni akisussaaffigineqalerpoq.

Akisussaaffimmik tiguserup nassatarisaanik maanna Kommunit nunaqqatitta innarluutillit Danmark-imiittut qaqugukkut angerlartinneqarsinnaassanersut aamma oqartussaaffigilerpaat, taamatullu minnerpaamik Danmark-imisut isumagineqarnerattut pitsaatigisumik kiffartuunneqarlutik neqeroorfigisinnaalerlugit. Ukiut ingerlanerini namminneq piumassuserinngisaminnik Danmark-imi inissinneqarlutik innarluutilinnik, kisiannili Nunatsinnut angerlarusuttunik nunaqqateqartugut aamma ilisimaneqarpoq.